

LES
PLAIDOYEZ
TOUCHANT LES
CESSIONNAIRES,

ET

*Arrests de la Cour contre iceux, du
16. Janvier, & 5. Feurier 1608.*



A PARIS,
Par FLEURY BOVRRIOVANT, au
mont S. Hilaire, pres le puits cer-
tain, aux Fleurs Royales.

LES PLAINES

LES PLAINES

touchant le

le

le

le

le

le

le

le



LES PLAIDOYEZ

touchant les cessionnaires,

Et Arrests contre iceux.



ERNARD pour Pompee Lauuerjat a dit, qu'il ne representera riē à la Cour de ce qui est du subiect & de la cause impulsue de l'Arrest adiudicatif des despens, pour lesquels est demandée la cession, sa partie duquel la cause est aussi pitoyable & pleine de commiseration que autre qui se puisse presenter en Iustice ne le peut ramenteuoir, *ab eius commemoratione animus abhorret.* Il dira seulement que le proces a esté intenté pour vne accusation, de laquelle par l'Arrest le demandeur y est conuaincu, Monsieur Molé President à la Cour, qui a esté rapporteur du proces, se peut (s'il luy plaist) resouuenir de quelques particularitez du fait & des principaux merites du proces Criminel.

Le deffendeur men de iuste douleur a employé tout son biē pour en faire la poursuite, & se voit par les taxes faites en Iustice que les seuls salaires & la despence de tesmoins exa-

minez en la ville de Tours, espisse, & le salaire du Greffier, montent à neuf cens tant d'escus : En effect les despens (qui ne sont pas encores taxez) excèdent deux mil escus : & l'occasion de ne les auoir fait taxer par le deffendeur a esté l'absence du demandeur, qui par l'arrest a esté banny pour deux ans : le deffendeur auoit esperance de ne le iamais voir.

Il s'agit à present de sçauoir si le demãdeur fera receu au benefice de cession de biens : le deffendeur n'ignore pas qu'il a esté donné des Arrests, par lesquels l'on a esté receu à faire cession de biens pour despens de causes criminelles : mais de tirer ceste proposition pour en faire consequẽce au particulier de ceste cause, *Semper absolutè verum non est.*

La miserable corruption de ce siecle a produit tant d'exemples de toutes sortes de mauuais artifices, qui ont esté pratiquez sous le benefice de la cession, qu'il a fallu trouuer nouveaux remedes contre ceux qui s'y presenteroient; à l'exemple des anciens, qui ont tasché à empescher la frequence des cessions de leur temps, en astreignant les cessionnaires à des actes ignominieux : mais comme la malice des hommes surmonte toute la prouidence des Loix, plus l'on y a voulu apporter de remedes extraordinaires, & plus il s'y est pratiqué de fraudes.

C'est chose qui ne peut estre reuoquée en doubte, que s'il se remarque dol ou fraude en celuy qui demande estre receu à la cession, le

benefice luy est absolument desnié: il faut doncques examiner, si le demãdeur a commis quelque fraude au moyen dequoy il se soit rendu indigne dudit benefice.

Il plaira à la Cour remarquer, que lors du crime par luy commis; *hoc amplius*, lors de l'arrest & long temps apres, il a esté pourueu de l'estat de Preuost Prouincial en Berry; il y eust requeste présentée, à ce qu'il fust permis faire saisir ledit Estat, le mettre en criée, pour estre adiugé au plus offrant: il auoit esté iugé peu de temps auparauant pour l'estat de Preuost des Mareschaux de Chasteaudun, plaidant ledit Bernard pour lesdits de Thuilé & *non sine exēplo*, là lors il fust justifié à la Cour en l'Audience deux Arrests donnez en cas semblables & en mesmes termes que celuy qui se presente; entre lesquels l'vn estoit pour l'Estat de Lieutenant du Preuost de l'Isle de France: le Procureur seul des creanciers du demandeur se presenta pour plaider, qui n'auoit pas en main lesdits arrests: la Cour debouta lesdits creanciers de leur requeste.

Est aduenu que depuis l'arrest de condamnation contre le demandeur, il a vendu sondit estat seize mil liures, qu'il receut contant réellement & effectuellement, pour priuer le defendeur de ladite adiudication de despens.

En mesme temps tout son bien fust saisi & adiugé par decret pour dix mil liures: mais la Cour obseruera, s'il luy plaist, ce qui se pratique en ceste adiudication: Vn sien parrain est

le faiffant, deux de ses oncles paternels, vn frere
 beaufrere & deux de ses cousins, sont les oppo-
 sants. Le decret se poursuit pardenant vn Iuge
 qui estoit son oncle maternel, l'un s'ayde d'un
 nom imaginaire & supposé, sous lequel l'ad-
 iudication est faicte: & de fait sa propre sœur
 germaine en est aujourdhuy iouissante, ou
 plustost luy sous le nom de sa sœur: & soyent
 veuës (s'il plaist à la Cour) les requestes par luy
 presentées, il prend par icelles qualité de Sei-
 gneur de la terre adiugée par decret, le tout fait
 frauduleusement & insidieusement, & pour
 debtes supposées: en sorte que, *ex preceden-*
tibus & ex subsequentibus, la fraude est euidente
 & manifeste, qui rend le demandeur non rece-
 uable à requérir le benefice de la cession.

Subordinément & sans se departir par le
 deffendeur du chef de la fraude exclusif de la
 demande du demandeur, en tous cas ledit de-
 fendeur empesche formellement qu'il y soit
 receu, sinon aux charges & conditions portées
 par les arrests de la Cour establis par loy in-
 uiolable à cest esgard: à sçauoir de porter con-
 tinuellement le bonnet vert, à peine où il seroit
 trouué ne l'ayant pas, d'estre dès à present déclaré
 inhabile à receuir benefice, & de faire la cession, avec
 observation des formes essentiellement requises &
 accoustumées.

Celuy est indigne du benefice de la loy qui
 veut entreprendre de s'exempter des condi-
 tions sous lesquelles la concession est faicte.
 La Cour en termes prohibitifs ne veut pas que

aucun soit receu à la cession, sinon en se sou-
mettant à porter le bonnet vert : ceste condition
est, *modus qui suspendit id quod agitur quoad ex
post facto confirmetur*, le benefice est absolument
desnié, sinon à ceste charge expresse: le deman-
deur ne doit pas estre si presumptueux que de
s'imaginer que la Cour pour la consideration
particuliere, & pour la representatiō de ses pre-
tendus merites, voulut se départir de ce qui est
estably pour loy & arrest solennel; adē que
la loy dit que celuy qui contre tels iugemens
& arrests obtiendrait vn rescript du Prince de
ambitu teneatur.

Et pour monstrier que ce n'est de ce temps
seulement que ceux qui ont requis estre re-
ceuz à cession ont esté notez de quelque mar-
que ignominieuse, anciennement elle se fai-
soit en la ville de Lyon, *cum vituperio & igno-
minia* par des actes representez par *Gnid. Pap.
quæst. 343*. L'on voit encores à Padouē vne pier-
re appelée *Lapis vituperij*, où ceux qui estoient
receuz à la cession, *nudatis natibus ter lapidem
percutiendo*, disoient à haute voix: *Cedo bonis*, &
de cey a coustume escrete à l'exemple de ceux
de Rome, qui auoient la representation d'un
lyon de marbre deuant la principale porte du
Capitole: pour mesme effet le semblable s'ob-
seruoit en plusieurs autres lieux, comme il se
voit dans *Angel. & Paul. Castr. in l. omni Cod. qui
bon. ced. poss. Cic. Philip. 2. Plin. li. 33. cap. 2*. Le tout
quamuis fortuna vel parentum non suo vitio, ceux
qui faisoient la cession fussent reduits à ceste

misere & extremité, & qu'il ne se remarquoit en eux aucune fraude.

L'interest du defendeur est fort considerable, il a employé tout son bien, & s'est outre engagé à ses amis de grandes sommes pour la poursuite du proces; quand bien il seroit payé des despens adiugez par l'arrest de la Cour, il ne retireroit pas la dixiesme partie de ce qu'il luy couste, *furor est post omnia perdere nautum*: si le demandeur est condamné à porter le *bonnet vert*, sans doubte il payera: il a moyen de ce faire, par le moyen des deniers qu'il a deposez entre les mains de siens amis.

La Cour doncques par la sincérité accoustumee de sa bonne Iustice, fera iouyr s'il luy plait le defendeur des arrests donnez en cas semblables; deboutera le demandeur de sa requeste, en consequence des fraudes par luy pratiquées en la vente de son estat & de son autre bien: subordonément le condamnera à porter le *bonnet vert*, & à faire la cession aux lieux & formes à ce requis & accoustumez, à quoy le demandeur conclud.

L'ABBÉ plaidant pour Perrette Barathon defenderesse, contre Claude Preuost demandeur à l'entherinement de lettres de benefice de Cession dit; que pour monstrier que Claude Preuost (partie aduerse) estoit indigne du benefice de Cession, il ne representeroit rien de l'atrocité du meurtre & assassinat par luy commis en la personne de Vincent de Sauzay

zay, fils de Perrette Barathon sa partie; Monsieur Bernard Rezé, qui auoit esté rapporteur du procès & s'en pouuoit resouuenir, estant present.

Qu'il remōstreroit seulemēt le dol & fraude par luy commis incontinant apres qu'il auoit eu fait ce meurtre, qui estoit que pour frustrer sa partie des interests ciuils & despens du proces qu'il scauoit luy deuoir estre adiugez, il auoit suscitē ses oncles & autres plus proches parens pour faire decreter tous ses heritages & s'en rendre adiudicataires: lesquels s'en estant rendus adiudicataires les auoient laissez à sa sœur impotente & non mariée, qui en iouissoit aujourd'huy, & sous main luy en administroit le reuenu; entre autres de la terre de Lué, dont il se qualifioit encore seigneur: ce qui apparoissoit par les causes d'opposition aux criées de ses heritages, fournies par sa partie, & par la numération des deniers venus d'icelles criées, qu'il auoit en main. Qu'il auoit aussi vendu son office de Preuost des Mareschaux à celuy qui auoit espousé sa cousine germaine, seize mil liures; dont il en auoit donné partie en garde à vn sien oncle, lors que pour passer le temps de son bannissement, il s'en estoit allé en Hongrie,

peierans, atque ita secum;

Decernat quodcunque volet de corpore nostro

Isis, & irato feriat mea lumina sistro

Dummodo vel cecus teneā, quos abnego, nummos.

Bref que depuis ce meurtre par luy commis il

auoit touché plus de vingt mil liures prouenans tant des terres qu'il auoit vendues que de son office de Preuost.

De sorte qu'il n'estoit croyable qu'il eust consommé tant d'argent; veu mesmes que sa partie auoit fait tous les frais du procès, & que pour poursuiure la mort iniuste de son fils, ce qu'il pouuoit presentemēt monstrier à la Cour, elle y auoit consommé plus de dixhuit mil liures, & tellement engagé la meilleure partie de son bien, que aujourd'huy sur son aage, qui est de plus de soixāte & quinze ans, elle se trouuoit grandemēt affligée. Que luy ayant depuis trois ou quatre mois fait offrir, comme il auoit fait, sept cens escus, pour six mil trois cens tant de liures qu'il luy doit, il auoit assez tesmoigné qu'il auoit encores beaucoup de cet argent entre les mains de ses parens & amis, & se pouuoit acquiter enuers elle: n'estoit que comme il luy auoit osté son fils, qui estoit vn des supports de sa vie, il se persuadoit luy pouuoir pareillement oster les moyens de viure,

ad mores natura recurrit

Damnatos, fixa & mutari nescia.

Dauantage que ses complices ayant esté condamnés aux despens du proces, aussi bien que luy, la Cour de son propre mouuement par vn *retentum* les auoit reiectez sur luy, estimant qu'il seroit plus soluable que eux: que aujourd'huy, si ainsi estoit qu'il fut receu à faire cession, que non, il estoit raisonnable que eux, qui ont des moyens pour payer leur part, y fus-

sent contraincts, & ce *retentum* reuocqué. Ce que la Cour considereroit, s'il luy plaist, & y feroit droit suiuant le dire du Iurifconsulte en la loy derniere *D. de his que in fraudem creditorum, indignus est hoc legum priuilegio fraudator, cum contra leges peccet.* C'est pourquoy il concludoit à ce qu'il fut debouté de l'entherinement des lettres par luy obtenues, & déclaré indigne du benefice de Cession : & subordonnément supplioit la Cour, que où il y seroit receu, ce fut avec les mesmes conditions que les autres cessionnaires : se mettant dans quinzaine entre deux guichets, pour partie appellée estre conduit par vn huissier en la place publique, y abandonner sa ceinture, & prendre le bonnet vert ; que d'oresnauant il porteroit tousiours, autrement déclaré décheu de ce benefice, & permis à sa partie de le faire emprisonner.

B ij

Extrait des Registres de Parlement.

ENtre Claude Preuost cy deuant Preuost
provincial en Berry demandeur & requere-
rant estre receu à faire cession & abandonne-
ment de ses biens pour les sommes de deniers
& despens contre luy adiugez par Arrests de
ladite Cour & taxez à la requeste de Damoi-
selle Perrette Barathon veufue de feu Guillau-
me de Sauzay viuant escuyer sieur & Baron de
Contremoret tant en son nom que comme
ayant les droicts cedez de Damoiselle Marti-
ne de la Croix, veufue de feu Vincent de Sau-
zay viuant escuyer surnommé le Baron de Cō-
tremoret, & de Maistre Guillaume de Sauzay
son fils Aduocat en Parlement, comme aussi à
la requeste de Pompee Lauerjat Escuyer
sieur de Champroux que des despēs à taxer, &
selon le contenu de la commission par luy ob-
tenuë en la Chancellerie le troisieme iour
d'Aoust six cent sept, d'une part; & lesdits Ba-
rathon audit nom, & Pompee Lauerjat deffen-
deurs d'autre, sans que les qualitez puissent
preiudicier aux parties; Apres que le Roy pour
le demandeur a conclud en la requeste à ce que
sa partie soit receuë à faire cession & abandon-
nement de biens, attendu qu'il n'est question
que de despens; & que Bernard pour ledit de

Champroux a empesché la cession, attendu la fraude par le demâdeur commise pour la vente de son office de Preuost prouincial de Bourges, duquel il estoit pourueu lors que l'arrest a esté contre luy donné; lequel il a vendu seize mil liures, & les deniers mis és mains d'un sien amy de ceste ville, tous ses biens vendus à un sien Oncle, & ne delaisse pour cela d'en iouyr, partant non recepuable en la cession: & où il plairoit à la Cour le faire iouyr de ce benefice, soustient qu'il doit porter le *bonnet vert*. L'Abbé pour ladite Barathon a aussi empesché la cession. La Cour ayant aucunement esgard à la requeste du demandeur l'a receu & reçoit au benefice de cession, à la charge de porter désormais tousiours le *bonnet vert*, & en cas qu'il soit trouué ne portant bonnet de ladite couleur, la Cour dès à present comme pour lors l'a déclaré & declare descheu dudit benefice, permet en ce cas aux deffendeurs le faire emprisonner. Sera tenu faire ladite cession dans quinzaine pour toutes prefixions, & à ceste fin se rendra dans ledit temps entre deux guichets de la Conciergerie, pour de là estre conduict au lieu où il doit faire ladite cession, & satisfaire aux solemnitez en tel cas accoustumées, sans despens du present incident. Fait en Parlement, le seiziesme Ianuier 1508.

Signé,

VOYSIN.

B iij

*Extrait des Registres de
Parlement.*

ENtre Damoiselle Perrette Barathon veufue de feu Guillaume de Sausay viuant Escuyer sieur & Baron de Contremoret, tant en son nom que comme ayant les droits cedez de Damoiselle Martine de la Croix veufue de feu Vincent de Sausay viuant Escuyer, surnommé le Baron de Contremoret, & de Maistre Guillaume de Sausay son frere Aduocat en Parlement, & Pompée Lauuerjat Escuyer sieur de Champroux demandeur en execution d'arrest de ladite Cour du seiziesme iour de Ianuier dernier, & à l'entherinement d'une requeste du 4. du present mois, tendant à ce que par faute d'auoir par Claude Preuost satisfait audit arrest du 16. Ianuier, par lequel il est receu à faire cession & abandonnement de biens dans quinzaine pour tous delaiz, il fust deboutté du benefice de la cession portée par iceluy, d'une part; Et ledit Claude Preuost, cy deuant Preuost Prouincial en Berry deffendeur d'autre, sans que les qualitez puissent preiudicier aux parties: Apres que Isambert Procureur des demandeurs a demandé deffault contre le deffendeur; & pour le profit d'iceluy, attendu que Claude Preuost a esté cy deuant receu à faire cession, & ordonné que dans quinzaine pour tous delais il se rendroit prisonnier entre deux

guichets, afin d'exécuter ladite Cession, qu'il
soit deboutté du benefice d'icelle, & que
l'Huissier Segrot a rapporté auoir appelé à la
barre de la Cour ledit deffendeur, & Bazillon
son Procureur, & qu'ils ne sont comparus, La
Cour a donné & donne deffault aux deman-
deurs contre le deffendeur, appelé & rapporté
en la maniere accoustumée; & par vertu d'i-
celuy a deboutté & deboutte le deffendeur, à
faute de faire cession du benefice d'icelle. Faict
en Parlement le 5. Feburier 1608.

Signé,

VOYSIN.

